



CICC Bicentennial Celebrations Unit (BCU)

P.O. Box 209, Rarotonga, Cook Islands.

CONTACTS

Mr Tangata Vainerere, BCU Director

tvainerere@gmail.com Telephones: +682 29109 [H] 26509 [W] +682 79396 [M]

Mr Ngametua Tuakana, BCU Treasurer

ntuakana@westpac.com.au Telephones: +682 27737 [H] 22014 [W]

Ripoti ki te Uipaanga Maata a te Ekalesia Keretitano o te Kuki Airani Melbourne, Victoria, Australia, 12-21 Okotopa 2013

tataia e Tangata Vainerere, Director, BCU.

Kia Orana te Orometua Ngateitei, te Tekeretere Maata, te Mou Moni Maata, te Kumiti Akaaere, te Puapii Maata o Takamoa, te au Tavini o te Atua, te au Mata o te au Ekalesia ki te Uipaanga Maata, te au Tareketa, e te Kumiti Akateretere o te Uipaanga Maata 2013. Te Atua te aroa kia kotou katoatoa.

Teia te akakitekiteanga no runga i te au angaanga ta te BCU i rave mei te Marama Peperuare 2012 ki te Marama Okotopa 2013.

1. Akatupuanga o te Bicentennial Celebrations Unit (BCU)

I roto i te Marama Peperuare mataiti 2012 kua iki mai te Tekeretere Maata iaku ei akatere i te porokaramu teateamamaoanga no te akamaaraanga i te rua anereanga mataiti o te taeanga mai o te evangelia ki to tatou pa enua Kuki Airani. Te akameitaki nei au i te Atua no teia tikaanga tei oronga ia mai kiaku. Te akameitaki katoa nei au i te Tekeretere Maata no tei iki mai iaku ki runga i teia turanga teitei. I toku arikianga i teia tuanga angaanga, kua atu au i tetai parani no teia akakoroanga tei tuku atu au ki te Kumiti Akaaere i te ra 10 no Me i te mataiti 2012. Kua ariki te Kumiti Akaaere i te au tamanakoanga i roto i taua parani taku i tuku atu kia ratou. Ko te takainga mua i roto i taua parani ra, koia oki ko te akatupuanga i te putuputuanga Bicentennial Celebrations Unit (BCU) ei mono i te Bicentennial Planning Committee tei akatupuia i te mataiti 2009 inara kare i matutu tona turanga. Kua riro i reira te BCU ei arataki i te au teateamamaoanga no te akaepaepaanga i te rua anere mataiti o te taeanga mai o te evangelia ki te Kuki Airani. Ka rave te BCU i teia tuanga mei te mataiti 2012 e tae uatu ki te mataiti 2021.

2. Te au arataki o te BCU



Tangata Vainerere
BCU Director

E rua nga arataki (volunteer) o te BCU i teianei. Ko te Director ko Tangata Vainerere, e Diakono no roto i te Ekalesia Avarua e te Mou Moni ko Ngametua Tuakana no roto katoa i te Ekalesia Avarua. Te vai nei tetai taonga Administrator no te BCU e kare ake rai e tangata i rauka ake ei apai i teia taonga. Penei no te tutaki kore i pera ei. Kare ra e kino, te irinaki nei maua ko te Mou Moni e ka oronga mai te Atua mana katoatoa i tetai tangata tukatau ei apai i teia taonga



Ngametua Tuakana
BCU Treasurer

puapinga rava i te au ra ki mua.

3. Te Parāni Angaanga

Ko te parāni angaanga a te BCU tei roto ia i te tatā'anga tei akaupokoia e ko te 'BCU CONCEPT NOTE'. Tei runga teia tatā'anga nei i te website a te CICC. I roto i teia parani angaanga e 4 Pupu Angaanga (Working Groups) i tamanakoia kia akatupuia no te ōpara'anga i te au tuanga tukeke o teia parani.

- a) Pupu Angaanga 1: Events Planning and Coordination (EPC)
- b) Pupu Angaanga 2: Fund-raising and Resource Augmentation (FRA)
- c) Pupu Angaanga 3: Marketing and Public Relations (MPR)
- d) Pupu Angaanga 4: Historical Research and Publications (HRP)

Te anoanoia nei tetai au taeake ngakau toa e te aka'ātinga ei arataki e ei au mema no teia au Pupu Angaanga. Maata te angaanga ka anoanoia kia raveia, kare ra e maata ana te aronga angaanga ei rave ei. No reira me te manako ra koe i te tauturu i teia akakoroanga, aravei atu i te BCU Director.

4. Te au angaanga tei akamataia

4.1 Au Iriiri Kapua tei raveia

Kua rave te BCU i tetai au iriiri kapua ki te Kumiti Akaaere o te Akonoanga, te Konitara Ekalesia o Rarotonga, te Apiianga Takamoa, te Tipatimani o te Mapu CICC (Boys' Brigade, Girls' Brigade, Girl Guides, Christian Youth, Sunday School) e te au Ekalesia o Avarua, Nikao, Ngatangia, Titikaveka, Matavera, Arorangi, e Enuamanu no te akamarama i te parani angaanga a te BCU. Te manako nei te BCU no te atoro atu i tetai uatu Ekalesia i te Kuki Airani, Nu Tireni e Autireria tei inangaro i te uriuri manako ki te BCU no runga i te porokaramu o te 200 mataiti.

4.2 Akakitekiteanga Tuatua e te au Nuti

Kua akamata te BCU i tetai tatā'anga tei kapikiia e ko te 'Bicentennial Moments' i roto i te Nutireta a te CICC. Ka rave uatu rai te BCU i teia ei akakitekiteanga ki te katoatoa i te au angaanga ka raveia e te BCU i te au ra ki mua. Kua na runga katoa ana te BCU Director i te Porokaramu Ratio a Aunty Nga i te akakitekite katoa i te au nuti ou no runga i te au angaanga a te BCU.

4.3 Bibilia Maori ki te Roro Uira (E-Bible)

Kua angaanga kapiti te BCU ki te Orometua Robert Robati-Mani o te Otara Pacific Islanders Presbyterian Church, te Orometua Mata Makara o te Ekalesia Clayton, te Apiianga Takamoa, te putuputuanga United Bible Societies (UBS) na roto i te taeake ia Dr Daud Soesilo te Global Bible Translator o te UBS i te taipuanga i te Bibilia Maori ki roto i te roro uira (E-bible). I teianei, tere atu i te 70 au mema ekalesia ma te au Orometua i Rarotonga, Nuti Reni e Autireria tei taipu i te au Puka o te Bibilia. Te vai katoa ra te au mema o te pupu tatau e te akatanotano meitaki i te au taipuanga (proof-readers) tei akatereia e te metua tane ko Rairi Rairi. Kia akameitaki ia teia au taeake katoatoa no ta ratou tauturu i teia akakoroanga ma te tutakikore. Kua tamanakoia e ka oti teia angaanga i rotopu ua i te Marama Aperira kia Tiunu 2014.

4.4 To Toka Akamaaraanga o te Orometua Tioni Viriamu

Kua akamata te BCU i te teateamamao no te akamānea'anga i te toka akamaaraanga o te Orometua Tioni Viriamu e tu nei i roto i te aua Are Pure o te Ekalesia Avarua. Ka tamou katoa ia tetai papa tuatua ou (plaque) ki te pae i teia toka no te akamaramaanga o te taeanga mai o te Evangelia ki te Kuki Airani e tetai tua poto no Tioni Viriamu e tona nga taeake Porinetia ko Papehia e Vahapata. Te parani nei te BCU i te akatuera i teia toka i te mua mataiti 2014.



4.5 Kumiti no te Moni Akamaaraanga i te taeanga Evangelia

Te angaanga kapiti nei te BCU e te Opati o te Minita o te Moni, ko Mark Brown, e te au taeake ko Mike Savage, John Tangi, e Andrew Turua no te uriurianga i te tuatua no te Stamp e te Moni ka maania no te akaepaepaanga i te 200 mataiti o te Taeanga Evangelia ki te Kuki Airani. Ko tetai oki teia i te au parani a te BCU. Kua riro ra teia manako e na te Kavamani o te Kuki Airani e opara ki mua. Kua akatupuia i reira tetai Kumiti no teia angaanga. E mema te BCU i runga i teia Kumiti ou tei akatupuia e te Opati o te Minita o te Moni. Te akara atu nei i te au ra ki mua no runga i te au angaanga ka tupu mai na roto i teia Kumiti.

4.6 Urianga Ou o te Bibilia Maori

Te raveia nei te angaanga no te akaotianga i te urianga ou (New Translation) o te Bibilia Maori (Koreromotu Ou). Kua angaanga kapiti atu maua ko te Tekeretere Maata ki te Metua Tane ko Dr Daud Soesilo o te United Bible Societies e nga taeake rave angaanga maroiroi ko te Orometua Papa Aratangi, te Orometua Akangaroi o te akonoanga Katorika, ko te Metua Damiano Marinus, e te taeake no Nutireni mai ko Kevin Salisbury. Kua vaitata ua te Koreromotu Ou i te oti e te parāniia nei kia akatapuia teia i roto i te ono marama e tu mai nei. Me oti teia, ka akara atu te BCU no te tu'anga o te Koreromotu Taito.

4.7 Akapapaanga Moni

Te rave nei rai maua ko te Mou Moni o te BCU, koia a Ngametua Tuakana, i ta maua akapapaanga moni tuatau roa (multi-year Budget) no te au angaanga i tamanakoia kia raveia i raro ake i te porokaramu angaanga a te BCU no te mataiti 2013 e tae uatu ki te mataiti 2021. Ka oronga ia atu teia akapapaanga ki te Pupu Angaanga Kimi Moni o te BCU no te ākarakara'anga i tetai au ravenga e rauka mai ei te moni ei tauturu i te au angaanga a te BCU.

Reo Tuoro - Special Invitation

E reo tuoro teia ki tetai ua atu Mema Ekalesia CICC e noo nei ki Rarotonga i teia tuatau. Te kimi nei te BCU i tetai taeake karape, tukatau e te maroiroi i te angaanga kare e tutaki (volunteer) ei apai i te taonga **TEAM LEADER** no tetai Kumiti Angaanga o te BCU, koia oki, ko te **Working Group 4 - Historical Research and Publications (HRP)**. E au porokaramu angaanga tetai tei tamanakoia e te BCU kia raveia e ka anoanoia tetai tangata meitaki ei arataki i teia tuanga angaanga. No reira, me kua anoano koe i te aka'ātinga i toou taima ki teia angaanga, me kare i te uiui marama no runga i teia Kumiti, taniuniu mai i te Director o te BCU kia komakoma no runga i teia.

Kua rava teia no teia taima. Na te Atua e akamanuia mai ia tatou katoatoa. Tei inangaro i te uiui marama no runga i te porokaramu a te BCU, taniuniu mai i te Director i runga i te tereponi: +682 29109 me kare +682 79396 e te imere: tvainerere@gmail.com Ka kite ra.